

(2)

RELATIO
FACTA IN CONSISTORIO
SECRETO CORAM S.D.N.
GREGORIO PAPA XV.
A FRANCISCO MARIA
EPISCOPO PORTVENSI
S.R.E. CARD. A MONTE
DIE IANVARII M. DC. XXII.
SVPER VITA, SANCTITATE,
actis Canonizationis, & miraculis Beati FRANCISCI
XAVIER e Societate IESV.





3
 DIVINÆ prouidentiae consilio statutum est, Pater Beatissime, vt Christus Deus, & homo ineffabili mysterio in tempore de Virgine natus, diuinæ legis splendore humanum genus ad salutem illu-

straret: quem propterea Aeterni Patris nomine ita Isaias alloquitur: Ecce dedi te in lucem gentium, vt sis salus mea vsque ad extremum terræ. Non tamen omnibus per se ipsum Christus hoc beneficium contulit: sed intra Iudeæ fines se continuit; inde verò Apostolos, tamquam Sol splendidissimos radios, misit in vniuersum mundum prædicare Euangelium. nec Apostoli electi à Deo nuncij omnes orbis terræ prouincias peragrarunt. Sed cum falli non possit diuini Oraculi vox, quæ de illis prædixit: In omnem terram exiuit sonus eorum, & in fines orbis terræ verba eorum: Apostolis Apostolici viri successerunt, qui ab hac Sancta Sede missi Christum Dei salutem, ac veram mundi lucem alijs subinde prouincijs prædicarunt.

Hos inter Seruus Dei Franciscus Xauerus ita eluxit, vt in eo diuini Oraculi pars illa impleta

4
esse videatur: Et in fines orbis terræ verba eorum. Diuino enim beneficio segregatus in Euangelium Dei, qua immensa patent Oceani littora ad orientem solem, deduxit sonum Apostolorum, Et in fines orbis terræ verba eorum. Nam vt taceam Indos, Brachmanas, & Malabares, ad quos aliqua Euangelij fama olim emanauit, & multorum sæculorum ætatibus oblitterata Xauerij prædicatione reuixit: ipse primus Parauis, Malais, Iais, Acenis, Mindanais, Molucensibus, ac Iaponibus apostolico sane spiritu, & virtute Euangelicæ lucis fulgorem induxit, & salutem annunciauit. Ultra quas prouincias ad orientem solem nihil reliquum orbis terrarum habet.

Nuncius tamen ille hinc discessit apostolicus, à Paulo III. Pontifice Summo missus, vt illis gentibus salutem nunciaret: & Apostolus inde reuertitur. hoc enim nomen apostolicis factis primum in Lusitania obtinuit; deinde in India, Iaponia, Sina, & reliquis Orientis prouincijs conseruauit: communi enim omnium consensu non nisi Apostolus nominatur. Meritoq. tam honorifica appellatione dignus censetur, qui apostolico sane spiritu in tot prouincijs Euangelium prædicauit; ita Domino cooperante, & sermonem Serui sui confirmante sequentibus signis, vt multa centena hominum millia doctrina, & miraculis Apostolorum miraculis simillimis, ab idolorum seruitute ad veram libertatem filiorum Dei

tra-

traduxerit, in fide instituerit, & propria manu baptizauerit; inter quos Reges, ac Principes non pauci numerantur. Quod Apostoli nomen, ab hominibus Seruo suo tributum insigni miraculo Deus confirmasse videtur: cum illi non solum miraculorum, sed etiam linguarum dona concesserit; quibus olim Apostolos Hierosolymis ad prædicationem Euangelij armauit.

Apostolus igitur ad hanc Sanctam Sedem reuertitur, qui Apostolicus Nuncius ab illa missus est, vt fructum afferret: & fructus eius manet; quæ tu Summe Sacerdos benedicas, & Deo offeras. illius enim fructus sunt tot millia hominum Catholicæ Ecclesiæ aggregata; tot illustrium virorum victoriæ, qui in illis prouincijs, in quibus Euangelium prædicauit, pro fide tuenda sanguinem profuderunt, hodieq. profundunt; constantia, & patientia, qua innumeri confesores inter acerbissimas persecutiones fidem tuentur. illius etiam fructus est nomen, & fama, quam apostolicæ sanctitatis vbique obtinuit, & desideria totius Ecclesiæ de illius Canonizatione. nulla enim natio est in orbe christiano, quæ Xauerium eximie Sanctum non prædicet, cupiatq. plenos illi beatorum honores ab hac Sancta Sede pro tantis meritis tandem decerni.

Hæc igitur celebris famæ, communisq. Ecclesiæ vox, ac desiderium Pauli V. fel. rec. animum
incli-

inclinarunt, vt ad preces totius Societatis IESV, illiusq. Præpositi Generalis in ordinem ad Canonizationem de vita, & Sanctitate huius heroici viri iuxta sacros Canones inquiri iusserit: propterea q. fabricatis processibus de iure, ac stylo necessarijs, illisq. maturè per plures annos discussis, hodie in eo statu causa versatur; vt legitimè instructa videatur. & iussu S. V. coram amplissimo Sacro Senatu illius statum relaturus, breuitati consulendo, tripartito ordine illum explicabo.

Primo, vitam, actiones heroicas, virtutes huius Serui Dei proponam.

Secundo, res huiusmodi causa ordinatim gestas.

Tertio, miracula insignia à Deo eius intercessionem facta: vt si priora duo S. V. approbatione digna esse iudicauerit, & hanc postremam partem recensendam decreuerit: rogatis de more singulorum Reuerendissimorum DD. meorum sententijs; quid pro Dei gloria, & Catholicæ fidei exaltatione magis expediat, deliberare, & statuere possit.

DE VITA.

7



IN ea Nauarræ parte, quæ trans Pyrenæum montem ad Hispaniam pertinet, natus est Seruus Dei Franciscus Xauerus anno Domini millesimo quadingentesimo nonagesimo septimo, in castello Xauier, à nobilibus parentibus Ioanne Iasso regij eiusdem prouinciæ consilij præside, & Maria Azpilcueta Xauerij oppidi, & aliorum circa locorum dominis; à quibus piè educatus, & christianæ disciplinæ rudimentis diligenter instructus, vbi ætas adoleuit, Lutetiam Parisiorum missus est; vt in celebri illa academia litterarum studijs animum excoleret. Cumq. de eo domum reuocando pater cogitaret; Maria Magdalena Francisci soror, quæ Gandiæ discalceatarum Virginum magna sanctitatis fama Monasterium regebat, de patris consilio, ac fratris futura gloria diuinitus edocta, ad patrem scripsit: Parisijs Franciscum omni ope foueret, vt in studijs pergeret, etiam si opus esset domesticum censum in ea re exhaurire: quia nimirum electus à Deo noui orbis Apostolus erat.

Parisijs ergo amicitiam contraxit Franciscus cum Ignatio Loyola Societatis IESV postea parente, & fundatore; qui eum ad diuinam gloriam procurandam socium à Deo multis obtinuit precibus, & lacrymis: spiritualibusq. exercitati-

ni-

nibus instruxit. Quibus ille tantum profecit; vt Euangelicæ perfectionis amore incensus, sæculi honoribus, ac diuitijs contemptis, durum, ac vile vitæ genus eodem B. Ignatio duce animosè aggressus sit, & constanter profecutus. Victum emendicando quærebat; orationi, & diuinis rebus vacabat semper; corpus ieiunijs, alijsq. pœnis affligebat.

Egressus Parisijs in Italiam venit; & dum peregrinandi in Palæstinam tempestatem expectat cū socijs, vt Turcarum conuersioni ibi incumberent, cuius rei voto se astrinxerant: Venetijs, Bononiæ, alijsq. vrbibus præclaro sanctitatis exemplo, & spiritus ardore, concionando, alijsq. pietatis, & charitatis officijs proximorum saluti indefesso incubuit studio. Venetijs ad titulum paupertatis sacerdos creatus, magno humilitatis, & charitatis exemplo ægrotis in hospitali domo inferuiuit, illis familiarius assistens; quorum aspectum propter insanabiles morbos, ac vulnera reliqui ferre non poterant. & vt gloriosorem de se victoriam reportaret, sæpe aquam hausit, qua illorum vulnera lauerat.

Sublata igitur nauigandi eo anno spe, Romam cum alijs socijs venit, quemadmodum inter omnes conuenerat; vt se Summo Pontifici sisterent, offerrentq. in quascunq; vellet prouincias amandare ad proximorum salutem procurandam, vitamq. hæc spiritualibus exercitationibus, ac labo-
ri-

9
ribus pro diuina gloria ditissimam, cæterum pauperrimam, & asperam dum agerent, iactis primis Societatis IESV fundamentis, Ioannes Lusitaniæ Rex, Orientalis Indiæ conuersioni maxime intentus, à Paulo Papa III. suppliciter petijt, vt ex Ignatij focijs, quos sanctitatis, & doctrinæ fama ad eam expeditionem aptissimos iudicabat, aliquos sibi mitteret, qui Euangelium vastissimis illis in prouincijs promulgarent.

In quam rem Ignatius, cui Summus Pontifex negotium commiserat, Franciscum nominauit: qui Apostolici Nuncij dignitate, ac potestate à Pontifice instructus, Indiæ Apostolus iuxta sororis vaticinium à Deo electus, sine mora proficiscitur: eaq. sanctitatis, & Apostolici ardoris signa exhibuit in Lusitania, vt communi omnium voce Apostolus dictus sit. quod nomen non solum ipse dum vixit, & post obitum obtinuit; verùm in illius memoriam, ac venerationem, quâ Lusitanum imperium per Europam, Africam, Asiam, & nouum patet orbem, omnes de Societate IESV Apostoli nominantur. tantum enim fidelis Dei seruus apostolicis factis, & sanctitate promeruit, vt non solum sibi gloriosum nomen, sed suis etiam comparauerit.

Ex Lusitania in Indiam soluit: nec vllis regij Prætoris precibus adduci vnquam potuit, vt viatici nomine aliquid acciperet præter vilem centonem. Mendicando victum quærebat in nauibus

B

pu-

publico dormiebat, nautico fune pro lecto vtens: æ grotis omni ope semper præsto erat; illis cibos, si indigerent, non solum à ditioribus procurabat, sed propria etiam manu, & industria parabat, ac diuidebat, non veritus etiam illorum vestes lauare, aut aliquod officij genus, quamuis vilissimum, illis exhibere; in quibus prudens Christi seruus ipsum Christum semper agnouit, & veneratus est. Vt sacramenta illis ministraret, periclitantibus adesset, & mœrentes solaretur, totas noctes vigilabat indefessus, diebus in summo labore, & oratione transactis. vnde aliqui dicere soliti sunt, Francisci delicias esse præter orationem, æ grotis inferuire. Quod viuendi institutum non solum in hac, sed in omnibus nauigationibus, in quibus deinceps magnam vitæ partem posuit, constanter retinuit. Nec solum in mari eius charitas ita in pauperes, & ægrotos eluxit, sed dum in vrbibus moraretur, nihil ab hoc instituto vnquā remisit. Quin omnibus omnia factus, vt Christo omnes lucrificeret, reliquos homines, qui vel propter pinguiorem fortunam, vel propter valetudinem ea opera non indigebant, alijs non minoribus officijs profecutus semper est; nulliq. vnquam labori pepercit, quo proximorum saluti prodesse posset.

Indiam vt attigit post tàm longam nauigationem, quæ annum tenuit, curando corpori nulum tempus dedit; sed ignem, quem in illas pro-

uin-

uincias mittere venerat, statim cœpit spargere. Pueros, ac rudem plebem per urbem tintinabulo vocabat, cogebatq. in aliquam Ecclesiam, in qua omnes doctrinam Christianam edocebat ea spiritus efficacia, vt altissimè in omnium corda penetraret, veluti doctrina ipsa Apostolorum. Orationes per plateas, ac domos vt decantarent, omnibus persuasit, & in domibus cuique suis familiaribus eas traderent. Qui mos ab eo indutus, hodie in India, magna Dei gloria, perseverat.

Adultos ad confessionem, ac pœnitentiam peccatorum, Christianæq. vitæ sanctitatem omnibus officijs inuitabat: Ethnicos ab idolorum seruitute ad veram filiorum Dei libertatem indefessò studio, & per aperta vitæ discrimina vocare nunquam destitit, in ignotas, & abditas penetrans prouincias, nudis sæpe pedibus, laceris vestibus, & mendicus. Qua in re ita serui sui conatibus Deus adfuit, clarissimis, & Apostolorum similibus miraculis sermonem illius vbique confirmans, & interius auditorum corda mouens: vt multa centena hominum millia ad fidem conuerterit, & baptizauerit, multos vitiorum cœno pertinaciter immerfos, magnis ad id susceptis peregrinationibus, nauigationibus, & corporis afflictionibus, extraxerit.

Multa sunt Regna, Prouinciæ, & Insulæ, per quas Cæli, ac Romanæ Sedis Nuncius verbum Dei seminauit. Tandemq. dum aditum Euange-

lio quærit in vastissimum Sinarum imperium, laboribus supra humanas vires pro Dei gloria fractus, & cælesti Christi videndi ardore extenuatus, in Sanciano deserta insula ad patriam, & nuptias Agni euocatus fidelis seruus, in gaudium Domini introiuit.

DE VIRTVTIBVS.

APOSTOLICI huius viri clarissimarum virtutum insignibus excellens sanctitas per R.R. PP. Rotæ Auditores firmata, & per Sacram Rituum Congregationem legitimè comprobata, apertè ex dicendis manifestatur.

DE FIDE.

Fides in excellenti gradu in eo floruit; quam non solum per Sacramentorum deuotam susceptionem, & indefessam ministrationem professus est: sed heroicis etiam operibus; susceptis ad eam prædicandam per barbaras, & ignotas prouincias, ac maria magnis peregrinationibus & nauigationibus, per aperta vitæ pericula, & sine villo humanæ opis auxilio; exprimens in se ipso Euangelicæ doctrinæ, quam prædicabat, puritatem, & sanctitatem. Attulitq. eius fides in millia millium per vastas illas prouincias propagata,

13
ta; & allatura in posterum est, fructum benedictionis in horrea Domini. Ex quibus rebus ea virtus eminenter in illo claruisse patet.

D E S P E.

Firmissimam habuisse spem planum est: cum in eo omnia illa abundanter concurrissent probentur, quæ cum tali spe indissolubili nexu sociantur: nempe Despectus temporalium rerum, voluntaria ærumnarum Perpeffio, Aggressio difficultium, Securitas in periculis, Gaudium in aduersis. Nam Despectus temporalium apparet, quòd spretis mundanis honoribus, diuitijs, feudalibus castrorum successionibus, dignitatibus, & commodis humilem vitam, religiosamque paupertatem sub obedientia in viridi ætate est ample xus. Quoad voluntariam ærumnarum Perpeffionem, euidentissime constat illa: quia cunctis reiectis cõmodis, ærumnas plurimas, maximosque labores propter Christum voluntarie suscepit, vt inferius suo loco designabitur: ita vt quanto maiores illius fuerunt, labores & grauiores ærumnæ, tanto etiam in eo feruentiorem spem fuisse affirmandum sit. Quoad Aggressionem difficultium, illam docent plurima ardua, difficultia, & humanas vires prorsus excedentia, quæ toto vitæ cursu perfecisse probatur; inter quæ duo tantum, ne longior sim, narranda censui. Primo videlicet, admi-

mirabile illud : quòd , cùm magnis itineribus per montium cacumina numerosus Badagarum exercitus in Regnum Trauancor, atque Promòtorium Comorini furens excurreret in ruinam Christianorum, quos ipse baptizauerat ; Xaue-rius solus, inuictæ in Deum fiduciæ clypeo te-ctus, obuiam barbaris processit, militesq. seuerè increpauit. Stetit illicò exercitus immobili ve-ctigio, nec progredi vltèrius potuit. quin etiam Ducibus pergere volentibus respondebant mi-lites, progredi se nequaquam posse, & cernere è regione astantem cum Xaerio virum quen-dam magnum, & maiestate terribilem, nigra veste indutum, qui eos terrebat : neque ardo-rem ex vultu atque oculis illius emicantem fer-re se diutius posse. Quod cùm ipsi etiam Du-ces experirentur, retrocessit totus exercitus, at-que ab incepto destitit, victorq. Xaerius Chri-stianos, quos Christo pepererat, à cæde, & rapi-nis liberauit .

Aggressionem difficilium ostendunt etiam cū admiratione, tot peregrinationes susceptæ ad in-fideles populos, incognitos, & barbaros, cum aper-to vitæ periculo, solo studiò diuinæ gloriæ propa-gandæ. Securitatem in periculis in illo floruisse certissimum est, cùm probetur sine cura fuisse in medijs curis, & sæpius sine metu fuisse imminen-te naufragio, securum ingruentibus hostibus, se-curum in infirmitatibus ipsis : ita vt firma spes in :

Deo,

15

Deo, quæ in illo vigeat, certam securitatem in periculis ei præstaret non secus, quàm anchora naui in fluctibus præstat; & in Domino confidens nihil timeret, possetque cum Dauide canere: Si exurgat aduersus me prælium, in hoc ego sperabo.

Postremo quoad gaudium in aduersis, illud eminenter probat continua hilaritas animi, promptaq. voluntas, quibus non solum sine mærore, sed cum Apostolo ad Rom. 5. glorians in spe filiorum Dei, tot labores, & ærumnas, ac pericula, & aduersa passus est, iustè, ac piè viuens in hoc sæculo, expectans beatam spem, & aduentum magni Dei, qui seruum, quem vigilantem, & laborantem cum gaudio inuenerit, ad gaudium vocat æternum.

C H A R I T A S.

Charitatem, virtutum præstantissimam, seruum istum Dei habuisse in eminenti gradu tam erga Deum, quàm erga proximum, euidenter probatum est.

DE CHARITATE IN DEVM.

NAm quoad Deum, charitatem illius ostendit exacta obseruantia mandatorum; ipsius etiam Dei, & Domini nostri Iesu Christi approbatione, qui dixit Ioan. 15. Qui habet
man.

mandata mea , & ſeruat ea ; ille eſt, qui diligit me . Quàm exactè verò fidelis iſte ſeruus Domini mandata ſeruauerit , colligitur ex puritate conſcientiæ , ex aſſidua meditatione diuinæ legis , ex horrore cuiusq. etiam leuiſſimæ tranſgreſſionis , ex ſtudio quod adhibebat , vt ab alijs diuina præcepta ſeruarentur , ex voluntaria paupertate , caſtitate , & obedientia : in quibus tantum excelsit , vt non ſolum iſ , qui ex aduerſo eſt , nihil habens de illo dicere , obmuteſceret ; ſed omnium lingua , ac vocibus , tam à chriſtianiſ , quàm ab idololatriſ non niſi Sanctus communiter diceretur . quæ fama non niſi exactiſſima diuinæ legis obſervatione colligi poteſt.

Probant eandem charitatem frequentia , & familiaria colloquia , quæ longa , & quàm aſſidue cum Deo habebat . in quibus Dei amore taliter incendebatur , vt ſepè vultu inflammato , oculis ad cælum affixis , diuinitus à terra eleuaretur : quaſi in cælum , vbi erat illius theſaurus , & propterea cor , etiam corpus raperetur . & ſepè non valens reſiſtere abundantie dulcedinis diuini amoris , clamauerit : SATIS EST DOMINE , SATIS EST.

Oſtenditur eadem charitas per extinctionem timoris in ſubeundis periculis , & arduis operibus aggrediendis amore Dei . Nam perfectæ charitas foras mittit timorem . Ille verò tantum abſuit à timore , vt propter Deum non timuerit naufragium , peregrinationes per inuia , & deſer-

ta loca non formidauerit, nec feros ethnicorum mores expauerit; quamuis ab omnibus vno consensu exitium sibi imminere denunciaretur. Nec minus elucet eius eximia in Deum charitas ex contemptu rerum humanarum, & mortis; qui in tota huius Serui Dei vita ita elucet, vt verè cū Apostolo posset dicere: Quis nos separabit à charitate Christi? tribulatio? an angustia? an fames? an nuditas? an periculum, &c. in his omnibus superamus propter eum, qui dilexit nos.

Nec minus eandem testabatur charitatem, continuò de Deo meditando, dulces de illo sermones habendo, cunctos ad illius amorem hortando. Iaculatorias orationes ex inflammato pectore etiā in medijs turbis emittebat tanta dulcedine; vt audientes ad Dei amorē accenderet: quin & dormiens in has voces frequenter erūpebat. Mi IESV, Dulcis IESV: non solum enim in vigilia, sed in somno IESVM in ore, & corde habebat. quod ardentissimæ charitatis signum est clarissimum.

DE CHARITATE IN PROXIMVM.

Charitas verò in proximum seruentissima in eo probatur non solum ex præmissis de charitate ergà Deum: sed etiam ex pijs operibus, in quibus se continuò exercuit, seruiendo ægrotis hospitalium locorum, illis cibum proprijs manibus ministrando, sordes illorum purgando, lectulos versando, & sternendo; sinu amplexuq. fove-

C bar

bat quantumvis vlcerofos, & tabidos; cum illis crebrò pernoctabat; extremum agentibus spiritum aſiſtebat; mortuos abluebat, & ſepulturæ tradebat; omniaq. alia quantumvis vilia ſeruitia, & charitatis officia eiſdem præſtabat indefeſſus Dei ſeruus, omnibus omnia factus.

Nec minus eadem charitas in proximos colligitur ex beneficentia, qua maximè eluxit in pauperes, illis non ſolum quæ habebat benignè diuidendo: ſed etiam ab alijs, vt illis daret, ſæpiſſimè oſtiatim poſtulando: omnia in egenos, & deſolatos diſtribuendo tanto amoris ſenſu, & voluptate; vt non ſolum Pater pauperum communiter diceretur: ſed etiam illius delitias pauperes eſſe, & orationem permulti affirmauerint. Eximia pietate fuit erga carceratos. illos crebrò viſitabat, verbis conſolabatur, cibo potuq. reficiebat, ſpiritu. li alimonia confirmabat, cauſamq. illorum, quantum modeſtè poterat, agebat. idq. tam ſedulo, vt ſæpiſſimè domum rediret poſt occaſum ſolis; quin tam longa ſentiret ieiunia; cuius potiſſimus cibus erat Chriſti voluntatem facere.

Ardentem etiam charitatem in proximos probauit per tantum tempus pueros chriſtianæ fidei elementa docendo; rudibus adultis chriſtianam legem vberius explicando; peccatores omni conatu ad officium reuocando; infidelibus diſcuſſis errorum tenebris Euangelicam lucem aperiendo; vehementiſſimo zelo animarum, quo ſemper
flagraſ-

flagrasse ostendunt satis quæ hæcenus diximus, & alia charitatis officia, quibus nil aliud quærebat, præter animarum salutem; quas ita diligebat; ut sanguinem pro illis dare paratum se esse ostenderet ipsis periculis, & laboribus, quos intrepidus ob illarum salutem aggrediebatur, armatus Domini exemplo, qui prior dilexit nos, & lauit nos à peccatis sanguine suo.

DE ORANDI STUDIO.

H Abuit hic Servus Dei eminenter orandi studium, quod charitatem indiuiduè committatur: cum nemo amet, qui non cupiat cum eo esse, & agere, quem amat; cumq. per orationem cum Deo simus, & agamus. Excelluisse igitur illum tam in vocali, quàm in mentali oratione probatur, non solum ex frequenti assiduitate, sed etiam ex feruente efficacia, & delectatione, quibus orare solitum fuisse constat. Tantum enim ei cordi fuit assidua frequentia orandi; ut nullæ difficultates, nullæ occupationes, nulla negotia quamuis ardua, nullumq. tempus illum ab ea retrahere possent, ubicunque locorum esset. quòd si aliquando solitum, & præfinitum tempus orandi, & meditandi propter occupationes, quas Ecclesiarum sollicitudo, & proximorum amor ingerebant, defluxisset; aliud pro illo reponebat: & cum aliter non posset, illud nocturnæ quieti

subtrahebat; noctes integras subinde orationi dās, vel maiorem illarum partem. Sæpiusq. obseruatum fuit, post graues, & multiplices diurnos labores à media nocte, vsque ad lucem orasse, Christi exemplum secutum, qui pernoctabat in oratione Dei; immo in medijs etiam ipsis tempestatibus nihil commotus animo orationem continuabat. De nocte surgens in hortis domorum Societatis deprehensus fuit sæpe; vbi libero, & fulgenti cælo fruens totus in contemplationem diuinæ pulchritudinis rapiebatur: & vt diutius hoc potiretur bono binas tantum, vel ad summū ternas horas quieti dabat; vt reliquum temporis meditando, orandoq. consumeret.

Feruens autem efficacia cum delectatione in orando satis demonstratur, tam ex prolixitate orandi per integras noctes, vt supra, quàm ex illius externa facie, ex qua in ipso actu ardor orantis ita apertè emicabat; vt totus cœlesti quodam igne exardesceret, ac in præsentibus quoque flammis pietatis emitteret; qui illius aspectu ad pietatem, & Dei amorem accendebantur. Illam etiam probat extasis, quam patiebatur orans, & missam celebrans; ita vt planè à sensibus abstraheretur, nec ministrum vestem identidem succutientem aduerteret, nec ad se rediret nisi post horam. Orando talibus affluebat gaudijs; vt vix illis ferendis mortale pectus sufficeret: & ob id auditus sæpe fuit dum secreto oraret dicens: Non plus Domine;

21

ne ; satis est Domine , & similia , de quibus iam diximus .

D E H V M I L I T A T E .

Humilitatis dono , Sanctitatis fundamentum , amplissime dotatum fuisse ostenditur ; cum in interna , & externa mirifice excelluerit.

Ac primodemissimè de se ipso sentiebat , se vilissimum omnium , & peccatorem maximum reputabat ; omnibus inferiorem se esse affirmabat ; & nihil erat tam vile , & abiectum , quo se dignum non putaret ; nihil honorificum , quo se indignum non iudicaret ; ita ut nulli præesse vellet , sed omnibus subesse cuperet , omnesque propterea ut superiores reuereretur .

Secundo eandem probauit humilitatem honorifica quæque penitus spernendo , ad suas laudes , non secus ac alij ad probra , erubescens . si quid esset unde laus ipsi aliqua posset peruenire , ut in faciendis miraculis , studiosè id factis , & verbis cœlabat , & sociorum aliorumque meritis , & intercessionibus adscribebat .

Auctoritatem amplissimam Legati Apostolici , qua instructus in Indiam missus fuerat , non solum non iactauit : sed data opera texit , quasi gladium in vagina : adeo ut per decem annos nemo illum Nuncium Apostolicum sciuerit , præter

ter

ter Episcopum Goanum; nec nisi semel ultimo quasi remedio ad Dei gloriam procurandam ea potestate usus est, re prius cum Episcopo Goano communicata, & illius permessa arbitrio.

Eadem humilitas ostenditur ex propria sui abiectione: nam Christum imitatus, cum diues esset omnium, egenus fieri voluit; & dum lautè ex suo posset, ex alieno precario victitare maluit, abiectissimo vestitu semper usus. Patet etiam ex quotidianis exercitijs, & actionibus, quibus sollicitam operam præstitit tam in Indica nauigatione, quàm in domibus hospitalium Indiæ, viliora quæq. ministeria, vt iam dictum est, hilariter & sponte eligendo: ex humili reuerentia ostenditur; qua semper veneratus est Episcopos, sacerdotes, & superiores quoscumque; adeo vt, cū B. Ignatio suo superiori scriberet, nonnisi genibus flexis scriberet reuerentiæ causa. Multaq. sunt alia, ex quibus planissime colligitur, Christi vestigia Xauerium fuisse secutum, qui de se dixit: Mitis sum, & humilis corde.

DE PAUPER TATE.

PAupertatem Euangelicam, quam vouit, perfectissimè ab illo seruata fuisse demonstrat ratio vitæ, quam semper seruauit in victu, vestitu, suppellectili, itineribus, habitatione. Victus namq. fuit parcissimi; non eo solum, vt corpus

23

pus affligeret: sed etiam, ut voto paupertatis satisfaceret; utque verum pauperem ageret, quodcumque sibi ab alijs ultro subministrabatur, & ea quæ solitus erat ipse per se mendicare, alijs pauperibus distribuebat, contentus ipse quolibet vili cibo, & pane obuius: ut latius dicemus dum de pœnitentia agetur.

In vestitu verò non minus tenax paupertatis apparuit. erat enim plerumque attritus, resartus, & assumentis varijs interfectus in summa optimarum vestium copia, quæ certatim illi ab omnibus offerebantur.

In suppellectili præterea eius paupertas valde resplenduit. Eius in cubiculo nihil aliud elucebat, nisi ipsa paupertas: nudi namque erant parietes: lectulus potius ad arcendum somnū aptus: quàm ad conciliandum, ut pote sine culcitra, sine lodicibus, vilibus tantum stragulis, duro cervicali adiuncto: & præter ista non aliud quidpiam erat in cubiculo, quàm pauci libri sibi, vel alijs necessarij.

In itineribus conficiendis, quæ tam longa, tam multa, tam difficilia fuere, tot longinquis peregrinationibus in ultimas terras susceptis, studium paupertatis suum maximè probavit; nullo alio vectore, quàm baculo pro equo, & vehiculo usus est, pedes semper incedendo, & non rarò sine calceis, sine alio tegmento plantarum. Viaticum non in pera, & sacco, sed in Dei benignitate, &
aliena

aliena pietate repositum habebat; nullum secum ferre solitus; nisi ubi per deserta, & inuia loca esset incedendum, & tunc nil aliud parabat quam cibum castrensem: & castigatissimum. Et in toto longo, ac impedito itinere Meacensi assa tantum victitavit oriza. Nec viatoria vestes luculentiores erant, quàm cibus. deò pannosus se in viam dabat, vt aliquando pueris ridiculo esset. E Lusitania in Indiam soluens, precario semper in nauui victitavit: nec ab illo instituto precibus Regij Prætoris vllatenus abduci passus est. Idem institutum in nauigationibus reliquis seruauit: nunquam alio diuertere solebat; quàm in publicas domos hospitalium: vt quemadmodum precario vesceretur: ita mendicato hospitaretur. hoc in Italia, hoc in Lusitania, hoc in India semper præstitit.

DE MORTIFICATIONE, ad Pœnitentia.

Mortificationis studium, & opera pœnitentiæ in eo tales fuisse constat; quales ad insignem & excellentem requiruntur sanctitatem.

Primo, eximia fuit in eo abstinentia cibi; cum non solum carnis, & vini; sed etiam panis triticei vsum procul à se abdicauerit. In priuata domo, & quoties apud alios non vesceretur; de industria

stria infulsis, & vilibus utebatur, ac parcissimè.

Secundo, manifeste colligitur ex maceratione carnis. corpus enim frequentissime flagellis cædebat, quandoq. æneo filo contextis; quæ etiam ferreis punctis, & stellulis de industria exasperabat, ita ut sanguinem copiosè profunderet. Somno nonnisi brevissimo corpus recreabat, incòmodè vel humi, vel fune nautico iacens, vel lectulo vilibus stragulis, ut supra dictum est, parato: reliquum noctis orationi, & contemplationi dabat, vel ægrotis visendis. Quin extra solum suum longe plura, & maiora pœnitentiæ opera exercebat. sæpius namque per plures dies ab omni cibo abstinuit: & aliquando à Dominica passionis usque ad Sabbatum maioris hebdomadæ. sæpe per biduum, vel triduum, quandoq. per quatuor totos dies, præsertim in principio suæ conversionis. quando etiam, ut doloris sensu magis cruciaretur; funiculis sibi adeo arcte coxendices, & lacertos constrinxit; ut, cum plures dies eo in cruciatu iter agendo perseverasset, animo repente destitutus præ doloris magnitudine, in media via conciderit: vinculis in carnem tam alte depressis; ut medici vulnus insanabile iudicaverint: actumq. de eius vita esset: nisi miraculose vincula rupta fuissent sine ope artis humanæ.

DE FORTITVDINE, ac Magnanimitate.

Fortitudine, Magnanimitate, & Patientia in laboribus tolerandis, & superandis heroice, & insigniter à Deo dotatus fuit. mundum vicit sui ipsius abnegatione: Christum secutus, honores, & dignitates sibi oblatas spreuit constanter: vitam religiosam, vilem, & pauperem elegit, & fortiter retinuit: eluxitque sæpe eius animi fortitudo, quòd plagis, & pustulis pauperum mendicorum lauatis, aquam ipsam, qua illas abluerat, non semel biberit.

Nec solū tam gloriosa de se ipso victoria eius emicuit inuictus animus: sed etiam in aggrediendis rebus arduis propter Dei amorem, & in superandis difficultatibus. Longinquas regiones, ac prouincias adiit, vitæ spreto periculo: nec barbarum, & efferum in hospites incolarum ingeniū timuit ad christianam mansuetudinem inuitare, à quibus sibi mortem paratam esse audiebat. Ab annò millesimo quingentesimo quadregesimo primo, quo in Indiam nauigauit vsque ad annum millesimum quingentesimum quinquagesimum secundum, quo diem clausit extremum, multas diuersarum nationum, & linguarum prouincias prædicandi Euangelij causa peragrauit; contractis etiam ob assiduos labores morbis grauissimis. sæpius naufragium passus est. ætus, frigoris,

nu-

nuditat²⁷is, vigiliarum, sitis, famis incōmoda diu-
tissimè sustinuit. nudis pedibus inter vepres, &
sentes longissima itinera perfecit. contumelijs,
probris, irrisionibus, & omnis generis illusioni-
bus, & iniurijs appetitus: verbera insuper, lapi-
dationes, ac sputa passus, omnia semper non so-
lum æquo animo, sed sibi plaudente, illius verè
discipulus, qui Apostolis dixit. Cum vos ode-
rint homines, & cum separauerint vos, & expro-
brauerint, & eiecerint nomen vestrum tanquam
malum propter filium hominis: gaudete, & exul-
tate: Deoq. propterea in omnibus gratias hilaris,
& humilis agebat; & pro illuloribus, ac persecu-
toribus deprecabatur.

DE FAMA SANCTITATIS, & nomine Apostoli.

PROPTER hæc non immerito, Beatissime Pater,
non solum vastissimas Orientis prouincias;
sed Occidentis etiam eximia sanctitatis fa-
ma viuus, & mortuus compleuit, vnde non alio
nomine etiam viuus communiter vocabatur, nisi
Sanctus, tam à Christianis, quàm ab infidelibus:
qui omnes in angustijs, illum etiam absentem in-
uocabant; illi ægros, ac mortuos offerebant, vt sa-
nitatem, & vitam restitueret: & quicquid illius
habere poterant religiose asseruabant.

Mortuus omniū prædicatione est celebratus.

D 2 Cor-

Corpus eius Malacæ & Goæ eximia veneratione exceptum est tanto populorum concursu; vt, cum primum Goæ expositum fuit, per multos dies cācellis, lictoribus, armato milite concursus fuerit compefcendus. qui vsque ad hanc diem maximus est, confluentibus ex tota India multis cuiuscunque conditionis, sexus, & ætatis ad eius sepulcrum: vt testantur vota soluta, tabellæ appensæ, & peregrinationes solemnes. Vestes, superpellitium, & alia, quibus vsus est, pro reliquijs religiosè venerantur omnes; multaq. propterea, ac magna à Deo beneficia comparant. loca etiam, quibus ille aliquando diuersatus est, piè ab omnibus religiosa frequentia coluntur.

Imagines ipsius tã publice, quàm priuatim deuote à populis visitantur, & coluntur. & in promōtorio Comorini in Ecclesia Cottatæ illius imago in tanta veneratione est; vt ethnici, & fideles propterea ad ecclesiam illam religiosè peregrinentur; nec alio nomine illam appellent nisi ecclesiam magni Patris; donaria illi offerunt; vota soluunt; ac beneficia à Deo illius intercessione postulant; & non vulgaria singulis diebus obtinent. Tanta veneratione christiani, & ethnici oræ Trauancoridis propè promontorium Comorinum colunt, & venerantur Xauerium: vt, cum in interioribus locis dictæ oræ duodecim ecclesiæ fuerint destructæ, & nūquam deinceps renouatæ, solum ecclesia, vbi est posita imago illius, hucusq; intacta persistat.

Ac-

Accedit illustre testimonium præcipuorū ætatis nostræ scriptorum de insignibus virtutibus huius eximij viri, & de opinione sanctitatis, quam habet in toto orbe christiano. quadraginta sunt, fermè omni exceptione maiores; vtpotè Cardinales, Episcopi, Sacerdotes, Religiosi, Iurisculti, aut alia prærogatiua insignes; qui singulare testimonium de eius sanctitate protulerunt; omnes ordinatim nominati in iam dicta relatione Auditorum Rotæ.

Concurrit vehemens desiderium, & summa expectatio totius vbiq; Ecclesiæ ob continuatam perseuerantiā prædictæ opinionis sanctitatis, quæ non solum eius morte latius propagata est; sed in dies magis, ac magis propagatur.

Postremò superadditur honestissimus titulus Apostoli; quem summo consensu Hispaniarum populi, & Indiæ illi detulerunt: apud quos non alio appellatur nomine, nisi Apostolus. quod non solum mirabili præfagio Mariæ Magdalænæ eiusdem Xauerij sororis natu maioris (de quo supra egimus) verum insigni miraculo Christus illi confirmasse videtur: cum illum linguarū dono exornauit, quo Apostolos ad prædicationem Euangelij instruxit.

30
DE DONO LINGVARVM.

Diuersarum namq. gentium linguis, quas non didicerat, cum eas Euangelij causa adiret, ita eleganter, & expeditè loquebatur, ac si ibi natus, & educatus esset. & contigit non raro; vt eum concionantem diuersarum nationum homines, sua quisque lingua planè, & politè loquentem audiuerit. id quod pro maximo miraculo ab ea gente habitum, non solum auxit venerationem Xauerij; sed multos etiam ad fidem conuertit. Voluit enim Deus, qui illum ad prædicationem Euangelij in illis prouincijs segregarat; vt, sicut in cæteris apostolicum spiritum acceperat: sic etiã dono linguarum Apostolis similis esset: & vt non solum spiritus feruore eximio; sed etiam varijs linguis magnalia Dei vbique loqueretur.

DE GESTIS IN CAUSA.

QVibus sic summatim relatis de vita, heroicis virtutibus, & actionibus huius Serui Dei Xauerij.

Ad secundam partem circa res ordinatim gestas in huiusmodi causa deueniendo iuxta præmissum ordinem; Sanctitati Vestræ exponitur; qualiter anno à Xauerij obitu sexagesimo; cum fama Sanctitatis, & miraculorum vndique in ore Christiani populi celebris esset: placuit. Fel. rec.

Pau-

Paulo Quinto ad preces Societatis IESV committere DD. Cardinalibus Sacrae Rituum Congregationi Praefectis; ut super recognitione processuum per ordinarium Indiarum, Goæ, Cocchini, Bazzaini, & Malacæ ad instantiam Ioannis Lusitanæ Regis, ut dictum est, fabricatorum; ac super fama Sanctitatis, & miraculorum, ac populorum deuotione in genere inquirerent, & referrent: an talia viderentur, ut ad specialem inquisitionem procedendum foret. quæ Sacra Congregatio annuente eodem Paulo Quinto sub die vigesima Martij anno millesimo sexcentesimo decimo deputauit bon. mem. Cardinalem Pamphilium: qui auctoritate Apostolica, ac eiusdem Sacrae Cōgregationis Rituum nomine per se ipsum, vel aliquem Prælatum, seu Prælatos ab ipso eligendos in Vrbe, cum notarij deputatione, prædicta omnia perageret. qui Cardinalis, electo prius Nicolao Rogeto in notarium, ad omnia prædicta absoluenda deputauit tres Rotæ Auditores, Horatium Lancellottum deinde Cardinalem, in cuius locum subrogatus fuit Ioannes Baptista Cocchinus eiusdem Rotæ Decanus; Franciscum Sacratum tunc Archiepiscopum Damascenum, modo ob eius insignia in Ecclesiam merita Cardinalem, & Io. Baptistam Pamphilium: coram quibus exhibitis per legitimum procuratorem articulis, super generali inquisitione famæ sanctitatis, & miraculorum Xauerij, examinati fuerunt duodecim

decim testes, cum interrogatorijs; & seruatis alijs de iure seruandis.

Mortuo Cardinali Pamphilio eadem Sacra Rituum Cōgregatio sub die prima Septembris subrogauit Cardinalē Lancellotum: à quo deputato Ioanne Viseto notario in locum Nicolai iam defuncti; productisq. processibus huius causæ informatiuis, illisq. fideliter interpretatis à deputato interprete, & in forma recognitis: absoluta quoq. generica informatione Romæ, vt supra, sumpta: eadem Congregatio referente eodem Cardinale Lancellotto decreuit, sufficienter, & abundanter constituisse de fumo sanctitatis, vitæ, morum, & miraculorum; ac populorum deuotione erga Seruum Dei Xauerium: proinde posse ad specialem inquisitionem procedi.

Vnde idem Paulus Quintus per speciale rescriptum commisit eisdem tribus Auditoribus; vt causam huiusmodi reassumentes, omnia acta, & processus viderent; noua iura in Curia, & extra compularent; nouos etiam testes interrogarent; litterasq. remissoriales, & compulsores, prout opus esset, decernerent, & relaxarent: prout præuijs legitimè productis articulis, pro speciali inquisitione decretæ, & relaxatæ fuerunt ad Archiepiscopum Olyssiponen. ad Episcopos Pampilonen. Baionen. & Iacen. pro Ciuitate Pampilonæ; ad Archiepiscopum Goanum, seu eius Vicarium pro Ciuitate Goæ in India; ad Episcopum Cocci-

Coccinensem, seu eius Vicarium in India pro Ciuitate Coccini ; ad Episcopum Malacensem, seu eius Vicariū pro Ciuitate Malacæ item in India .

Quibus litteris sic expeditis, dum in partibus executioni mandantur : fuerunt hic Romæ ab eisdem tribus Auditoribus alij examinati testes super articulis in specie, ipsis prius citatis, & cum interrogatorijs, & alijs de iure requisitis.

Transmissis deinde ad urbem processibus remissorialibus, & compulsorialibus; qui vigore dictarum litterarum in partibus fabricati sunt, illisq. per fidelem portitorem consignatis, ac per deputatos ab Auditoribus fideliter interpretatis, productis, & recognitis; instante procuratore Societatis IESV, nomine etiam Serenissimi Hispaniarum Regis, & aliorum multorum Principum, & totius Indiæ Cleri; vt ad vltiora procederetur : tres Auditores prædicti visis omnibus, & singulis processibus iam dictis, illisq. maturè discussis, & examinatis : in pluribus Congregationibus, singillatim singulos legitimos, & legales, testesq. in illis contentos rite, & recte examinatos, ac esse in forma probanti, declararunt : & examinatis virtutibus, & actionibus per particularia dubia cum longa temporis maturitate; causa demum instructa iuxta canonicas sanctiones, de sanctitate, ac excellentia vitæ, ac miraculis constare censuerunt : suamq. super præmissis relationem fecerunt eidem fel. rec. Paulo Quinto. quam relationem

lationem S. V. mensibus elapsis ad eandem Rituū Congregationem discutiendam remisit.

Nos vero, Beatissime Pater, relatione Auditorum Rotæ accepta, & super illa pluribus habitis sessionibus, diligenter, & accuratè discussis eorundem Auditorum assertionibus, & conclusionibus: vnanimi voto censuimus, omnes supradictos processus authenticos, & validos esse: prout etiam censuimus, probationes in illis processibus contētas, super sanctitate, excellentia fidei, & præclaris miraculis Serui Dei Francisci Xauerij fuisse legitimas, & sufficientes. Quæ si Sanctitas Vestra talia esse statuatur, vt ad Canonizationem sufficere videantur: quæ supersunt tertio loco dicenda, de miraculis in particulari breuiter prosequar.

DE MIRACVLIS.

EX multis miraculis, quæ in processibus continentur in vita, & post mortem à Seruo Dei Xauerio patrata, pauca hæc collegimus.

DE MIRACVLIS IN VITA.

1. Aqua maris salsa factò signo crucis efficitur dulcis:

Cum Pater Franciscus Xauerius ad Sinas contenderet in magna naui Sanctæ Crucis, in qua quingenti erant vectores, cessantibus ventis tanta fuit malacia; vt per quatuordecim dies eodem hæerere

35

herere loco naus coacta fuerit : neque in illa maris vastitate ullus locus, vel insula apparebat, unde possent auxilium petere: propterea aquæ penuria ita laboratum est; ut præ siti multi iam ex vectoribus morerentur . Adeunt igitur omnes Xauerium, & enixè petunt; ut tanto malo opem ferat: ille post longam orationem benè in primis sperare iussit de diuina prouidentia, eos non esse perituros certo affirmans . deinde vocato nauarcho, & nautis, reliquisque vectoribus , iubet illos sumere aquam ex mari, atque dolia, urnas, ac vasa omnia naus impleri, quam cū degustassent falsam reppererunt . tunc Xauerius eleuatis in cælum oculis, magna in Deum fiducia, facto signo crucis aquam maris, quam in vasis illis collegerunt, benedixit, & præcepit, ut iterum degustarent: cui obtemperantes aquam illam dulcissimam, & optimam reppererunt. quo miraculo vectores Xauerium sanctum acclamarunt: & Mahometani aliquot, qui aderant, cum vxoribus fidem receperunt, aquam deinde illam, quæ abunde superfluit ex nauigatione, in varias prouincias, & vrbes Indiæ distribuerunt : qua multi egroti sanitatem miraculose receperunt .

II. Puer mortuus ad vitam reuocatur .

Puer quidam pestilenti febris correptus Mutano in oppido Indiæ Orientalis, veste funebri, hoc est sindone , de more illius gentis obuolutus, &

confutus per vigintiquatuor horas asseruatus, sepulture mandandus efferebatur magno parētum eiulatu. occurrit Xauerus, qui tunc in eodem oppido operam nauabat conuertēdis ethnicis, & erudiendis in fide christiana ijs, quos baptizauerat: itaque parentum orbitatem miseratus, genibus flexis, & oculis ad cēlum eleuatis, Deum orauit pro pueri vita; & corpus aqua benedicta asperfit: deinde iussit funebrem vestem rescindi; & cum cadauer appareret, cruce illud signans, atque manu apprehendens, in nomine IESV viuere iubet, & statim puer surrexit viuus; eumq. sanum, & uiuentem parentibus tradidit. & in memoriam, & honorem huius miraculi eo in loco crux ab incolis erecta fuit, magna omnium celebritate.

III. Mortuus, qui per diem fuerat sepultus, suscitatur.

Cum Seruus Dei in promontorio Comorino concionem ad populū haberet in ecclesia, in qua die præcedēti sepultus fuerat quidam defunctus: ipseque Xauerus difficultatem magnam pateretur in conuertendis ethnicis, qui aderant: orauit aliquantulum pro eorum cōuersione, & peracta oratione, vt ad Christum illos adduceret; iussit sepulcrum, in quo cadauer defuncti iacebat aperiri; & populo significauit, placuisse Deo, iterum mortuum illum ad vitam reuocare, vt ipsi conuerterentur: patefacto igitur sepulcro, & rescif-
fa

sa veste funebri ; qua defunctus erat inuolutus, apparuit cadauer . tunc verò oratione à P. Francisco pro vita illius Deo facta , statim surrexit uiuus . quo viso miraculo vehementer omnes admirati sunt, Deum laudantes, & admirantes Xa-uerij sanctitatem, & infideles illi, atque multi alij propter hoc miraculum christianam fidem susceperunt, & baptizati sunt ab eodem patre .

IV. Dum Missam celebrat altius cubito à terra eleuatur.

Dum Xauerius Teuanapatano in portu orà Coromandellis, & alijs etiam in locis Indiæ Orientalis Missæ sacrificium celebraret : visus est ab vniuerso populo, qui aderat Missæ, altius cubito sustineri diuina vi sublimis à terra . Quam rem omnes habuerunt pro miraculo, & dono particulari Xauerio concessio : eumque deinceps, vt virum sanctum venerati sunt ; credideruntque famæ, quæ de illius sanctitate, & miraculis vulgabatur .

V. Puer in puteo suffocatus , ☩ mortuus ad vitam reuocatur .

In ora Piscariæ Indiæ Orientalis apud oppidū Combuture, cum puer filius mulieris eiusdem loci indigenæ casu in puteum cecidisset; & iacēs per multas horas sub aquis suffocatus esset; mater, & eius cognati mortuum indè extraxerunt; cumque eum ad sepulturam flentes deducerent, accurrit
Dei

Dei seruus Xauerus ex proxima ecclesia sancti Stephani , quo venerat ad celebrandam Missam; quem cum vidisset mater pueri; eum deprecatur, vt vitam filio reddat: at ipse lacrymis matris commotus, & misertus pueri casum, propè accedens, oculis eleuatis, in genua prouolutus pro vita pueri orat: eiusque manu apprehensa, inquit: In Nomine Iesu Christi surge; & confestim puer surrexit viuus, & illum sanum tradidit matri suæ, & cognatis. Omnes ergo, qui aderant, tanto miraculo obstupefacti, cœperunt clamare Miraculum, Miraculum: & gratias Deo egerunt, qui meritis, & intercessione Patris Xauerij illud operatus est; Xauerus verò præcepit eis, ne cuiquam rem gestam narrarent.

VI. Cæco visus restituitur:

Dum Xauerus in Iaponia ethnicis fidem prædicaret mercator quidam, quem à multis annis apud omnes constabat esse cæcum, ad eum accessit, petens, vt vellet sibi visum restituere, quo iamdiu omnino carebat: Xauerus recitato prius super eo quodam Euangelio, fecit super eius oculos sanctissimum signum crucis; quo peracto subito, & eodem momento aperti sunt oculi eius; & cœpit videre, ac se domum recepit iussu eiusdem Patris Xauerij. Sequenti verò die venit prædictus cæcus ad ecclesiam, quærens iterum P. Xauerium oculis tamen apertis, & claris, & prostratus

tus ad illius pedes simul cum tribus filiis maximas ei gratias egit pro tanto accepto beneficio, affirmans se melius videre, quàm antea, cum nondum in illam cœcitatem incidisset: & postea deduxit vxorem, & totam suam familiam; petens à Xauerio, vt vellet eos baptizare, quemadmodum factum est: & vulgata fama huius miraculi inter alios ethnicos; commoti sunt vehementer quamplurimi, & plusquam trecenti conuenerunt Xauerium, petētes sacrum baptismum, quos omnes ille baptizauit.

VII. Mendicus vlcerosus miraculose sanatur.

Cum in promontorio Comorini occurreret Xauerio mendicus toto corpore vlcerosus: Pater illius plagas, & pustulas magno charitatis sensu lauit, & vt maiorem de se victoriam reportaret, hausit aquam, qua lauerat: postea in genua prouolutus, enixè precatus est Deum pro salute dicti pauperis; qui statim fuit liberatus ab omnibus plagis, atque vlceribus.

VIII. Cancer marinus deperditum in mari Crucifixum Xauerio miraculose defert.

Cum Franciscus Xauerius in Insulis Molucis ageret, atque ex Amboino ad Baranulam Insulam nauigaret: saeuatempestas exorta est: ad eamq. sedādā imaginem Crucifixi longam vno digito è collo detraxit, atque in mare immisit; dumq.
illam

- illam manu detinet desuper ex nauigio , forte accidit , vt ex manu dilaberetur , atque in medium mare decideret : qui casus Xauerium tantopere afflixit; vt magni doloris signa dederit. Sequenti vero die ad Insulam Baranulam peruenerunt , in qua est oppidum Tamalo, quod vectores nauigij nautæq. petebant. quare nauigio ad terram applicato descendens Xauerius cum socio per ipsum littus iter faciebat, quo Tamalum perueniret: dumq. medium milliare peregissent , atque à loco amissi Crucifixi multis iam milliaribus distarent: ecce tibi marinus cancer cum prædicto Crucifixo è mari crumpit in littus,quem chelarū vtrinque morsibus eleuatum , & erectum gestabat: & sic ad Xauerium festinus accurrit , atque ante ipsius conspectum stetit. at Xauerius ingenua se prouoluit; cancer verò expectauit, quousq; Xauerius Crucifixum ex ipsius chelis apprehenderet: quo peracto statim in mare vnde exierat se recepit: tum Xauerius deosculatus , & amplexatus Crucifixū , brachijs ad pectus in modum crucis porrectis , humi prostratus per semihoram in oratione stetit: idem fecit socius, qui ad latus adhærebat, gratias agens Domino IES V Christo pro tam insigni miraculo.

IX. Scapha tempestate abrepta miraculose redit ad nauem.

Cum Xauerius ad Sinas contenderet in naui Odoardi à Gama, sauiissima orta tempestate, ita vt
omnes

omnes de se actum esse existimarent : gubernator, ne repentina procellæ vis scapham auferret; validis eam rudentibus ad onerariam religari iussit. nauantes operam scaphæ nox oppressit; nec ita multo post abruptis retinaculis scapham tempestas abstulit tanto impetu; ut penè temporis momento omnium conspectum effugerit. ut vero quisque cognatos, necessariosque in scapha habebat: certatim eorum casum deplorare cœperunt. Xauerus ergo vniuersos collacrymantes intuens, bonum eos habere animum iussit, ac prædicit fore ut ante triduum filia remearet ad matrem; his verbis significans, scapham ad onerariam redituram.

Postero die prima luce Xauerus læto vultu prodijt in medium, ac nauarchum rogat, ut iubeat aliquem malo conscenso speculari, num scapha compareat; & ubi renunciatum est ex malo eam non conspici; in cubiculum se abdidit; ibique lacrymans bonam diei partem in oratione extraxit: indè læta nuncians, ipsos non multo post scapham esse visuros, nauarchum rogat, ut vela demittat, & scapham expectet: reclamantibus cæteris, quòd frustra iam expectaretur scapha, & quòd sine manifesto periculo onerariæ expectari non posset: nauarchus, qui precibus Xauerij defatigatus, vela demitti iusserat, intermisso temporis spacio, cum scapha nec adhuc cōspiceretur, & naus iam periclitari videretur, sæuiente ad-

F

huc

huc mari, tolli properè vela imperat, infistit Xa-
 uerius rogans nautas, vt adhuc paulum expe-
 ctent, certò affirmans, scapham nullo periculo
 onerariæ non multo post affuturam; cumque nau-
 tæ desperata re, ac stimulante metu nihilominus
 vela sustollerent: Xauerius accurrens, manuq. an-
 tennis injecta, per Christi mortem, & vulnera
 obsecrare institit; ne pigeret etiam num morari
 parumper. illi obtemperarunt, ipse semel atque
 iterum interea dum scapha expectaretur, & nul-
 libi conspiceretur, & omnes ibi sine periculo se
 immorari non posse censerent: sublati in cælum
 manibus enixè orabat nauarchum, cæterosq. bo-
 no animo esse iubens. interea naus expectans in-
 gentibus agitabatur fluctibus impunè; iamq. per
 tres ferme horas dilata omnium expectatione; pro
 desperata res erat: cum repentè quidam scapham
 apparere, atque aduentare proclamat: tum verò
 læti omnes Deo, Franciscoq. gratulari cœperunt:
 vt scapha in conspectu omnium fuit, confestim ad
 eam excipiendam naus in obliquum statuitur:
 at illa Deo ducente rectè ad onerariam tendit.
 aduentanti alacres nautæ funem de more eminus
 iniicere parabant: cum Xauerius nihil fune opus
 est, inquit, ipsa per se sponte accedet ad onerariæ
 latus: idque omnibus miraculo attonitis ita eue-
 nit; atque ita aptè se applicuit, vt miseri illi com-
 modè exciperentur: quin etiam in medijs flucti-
 bus retinente nemine tamdiù stetit, quoad reli-
 gare-

garetur ad nauim : vt fatis appareret eiufdem,
cuius adducta fuit precibus , eam retineri .

X. Super vrbe Tolo pluit cineribus .

Cum Franciscus Xauerus in Molucas Infulas penetrasset , & primus illas gentes ad Christum adduxisset: vrbs Tulus, in qua ad vigintiquinque hominum millia baptizauerat , suafu cuiusdam Tyranni fidem Christi deferuerat : ciueſq. eccleſia deſtructa cruces, & ſacras Sanctorum imagines per ludibrium fregerant : quam rem ægerri-
mè ferens Franciſcus : dolenſq. de iniuria Deo illata, & de pernecie illarum animarum ; poſtquam irritas ſuas preces vidit, quibus rebellium animos ad reſipiſcendū quoad potuit pertentauit : chriſtianos milites ad vindicandā Dei iniuriam promiſſione victoriæ excitauit . viginti igitur Luſitani cum aliquibus Molucarum indigenis , qui omnes numerum quadringentorum explebant , expeditionē aduerſus Tolum ſuſceperunt, Francisco ſuadente, & comite , ac felicem belli exitum promittente .

Erat arx Toli in edito loco poſita non minus armis, quàm ſitu munita: acceſſerat hoſtium fraus; nam ea parte editæ rupis, qua ſola adiri poterat, ſtimulos ferreos ſuppoſuerant, in quos ſeſe induerent, qui propè arcem conarentur accedere . Vix chriſtiani ad Tolum acceſſerant cum Francisco ad Deum preces fundente, ex vicini montis ver-

tice cum horrendo mugitu , & fragore magnum erupit incendium , & ingens cineris, ac pumicum vis eiecta: quod nunquam in ijs partibus euenisse constat, non modo stimulos ferreos cooperuit; sed etiam arcis fastigium æquauit .

Per idem tempus terræmotus insolitus tectorū vrbs ingentem edidit stragem; ita ut plerosque hostium pauor compulerit in fugam cineris deinde, ac pumicum copia congesta, facilem in mœnia ascensum dedit . quare arx oppidum totaque regio sine vlllo certamine fuit subacta: & ciues , qui tali prodigio perterriti urbem deseruerant, & in proximas syluas se abdiderant , ad Xauerium statim supplices accurrerunt; & ad eius pedes prostrati, delicti veniam petierunt. Xauerius igitur eosdem cum Ecclesia reconciliauit, imposita salutari pœnitentia; & vt templa euersa reficerent, & susceptam semel Christi fidem in posterum sanctè, pieque colerent .

Communis omnium etiam barbarorum consensus fuit, hanc memorabilem victoriam diuina, non humana ope obtentam fuisse: & tam opportune flagrantis montis auxilium cum subita cineris, & pumicum congerie miraculosè intercessione, ac precibus Xauerij euenisse: qui diuinam opem suis orationibus conciliarat: vt cuius belliauctor extiterat; præcipuus quoque suis orationibus esset adiutor .

DE

45

DE MIRACVLIS POST MORTEM.

I. Corpus incorruptum perseverat.

MOrtuo Patre Francisco Xauerio in insula Sanciani prope Sinas, eius corpus in capsâ lignea, viua calce iniecta, sub terra sepelitur: vt quamprimum exesa carne, ossa possent in Indiam deportari; quatuor inde post menses effoditur, aperta q. capsâ, & excussa calce, prorsus integrum corpus reperitur sine vlla tabe; ac si tunc humatum esset: ita ut color viuax, caro recens, vestimenta nulla ex parte læsa essent.

Iniecta iterum calce in eadem arca Malacam defertur: ibiq. aperta arca integrum sicut antea inuenitur. In templum deinde Dominæ nostræ de monte defertur, excussa q. calce in nouo loculo sepellitur: noui verò loculi breuitas coegit eos, qui funeri operam dabant, corpus nonnihil comprimere, atque inflectere. quod causæ fuit, vt ex humeris repente effluerit sanguis.

Cum ergo ibi aliquandiu iacuisset: nono post obitum mense, sepulcro patefacto non minus integrum ex humo, quam antea ex calce inuentū est: & velum, quo eius facies operata fuerat, propter ingestæ compressæq. terræ pondus in humatione, recenti imbutum cruore,

Quo moti miraculo, qui aderant, nouam curarunt arcam intus, forisq. serica, & aurea veste coopertam. sic in Indiam delatum Coccini portum

tum primùm appulit confluentibus deuotione , & admiratione ciuibus ad contuendum corpus. Inde Goam exportatum, celebriq., ac festa pompa à Prorege, & omnibus ordinibus exceptum in ecclesiam Societatis I E S V deferitur : vbi affluentis populicupiditati, vt satisfaceret: corpus validis cancellis munitum, per totum triduum oculis omnium exponi necesse fuit.

Et quoniam rei miraculum excedebat fidem: de mandato Proregis ab insigni medico corpus inspectum, pertentatumq. fuit, & compertum incorruptum, succosum, & molle, integris, ac solidis intestinis; ex quibus per paruum vulnus inflictum manabat sanguis, nullo balsami, oleiue indicio. Exacto triduo arca prope aram maximam ad dextram in sepulcro per eos dies parato, ad tempus condita est. Postea Vicarius Generalis Episcopi Goani sede vacante, & Inquisitor generalis, aperto sepulcro, multis collucentibus facibus, pro suo munere, atque officio pertentarunt corpus iterum, ac denuo, nihilq. non integrum reppererunt.

II. Corpus eius suauissimum emittit odorem.

Dum corpus Xauerij in insula Sanciano, vel Malaca loculo includitur, vel ab eo extrahitur: similiter dum Malacam, & exinde in Indiam naui aduehitur, vel Goæ visendum exponitur, aut ibidem in capsa visitatur: licet nullo odora-

men-

mentorū genere curatum esset : suauissimum tamen odorem ex se emittebat ; ita vt omnium spiritus suscitaret, & confortaret; nec poterant discernere; cuiusnam rei tam suavis ille odor esset.

III. Aduentu corporis Xauerij Malacæ cessat repente pestis .

Cum Malacam urbem in India Orientali celeberrimam, & frequentissimam sæua pestis inuasisset (quod propter ciuium peccata euenturum illi antea discedens Xauerius prædixerat) breuiq. tempore quamplurimi paucis admodum superstitibus periissent: necdum defæuaret lues; sed maxime in dies grassaretur: vt primum corpus Patris Francisci, quod ex Sinis in Indiam afferebatur, eò appulit; & ex naui in urbem delatum fuit; statim ac subito contagiosus ille morbus omnino cessauit: nec ab ea die mortuus vllus, aut morbo correptus fuit: sed adeo tota lues extincta est; vt tam pestiferi morbi deinceps ne vestigium vllum superfuerit.

IV. Ex digito pedis Xauerij defuncti recens sanguis effluit .

Cum Goam Xauerij corpus Malaca aduenisset, & in ecclesia fuisset expositum; magnaq. populi multitudo deuotione commota ad deosculandum illius pedes accessisset: deuota quædam mulier feruore deuotionis adducta, digitum pedis morfu apprehendit; & dentibus nixa est euellere

lere frustulum ; quod pro reliquia sibi conseruaret: ex quo morſu recens effluxit ſanguis; ac ſi manaret de corpore uiuo. Quo viſo miraculo omnes, qui præſentes aderant, valde ſunt admirati; & maximam inde deuotionem erga Xauerium conceperunt.

V. Puer utroque crure, & pede ſiccis, & aridis ad ſepulcrum Xauerij miraculoſe ſanatur.

Puer Ventura Goæ natus in domo Dominæ Ioannæ Fonſecæ, quæ illum, vt filium diligebat, habebat à natiuitate vtrumque pedem, & crura omnino ſicca, & arida; neque amplius digito craſſiora: ita vt per quinquennium ſemper humi manibus reptare cogeretur: nec erectum in pedes illum continere poterant, quin ſtatim caderet. multis remedijs fruſtra tentatis ad Xauerij opem Ioanna confugit, puerum magna fide, ac deuotione illi commendans; ſepulcrum illius cum puero per nouem dies viſitaturam ſe promittens: cūque votum cœpiſſet adimplere: tertia iam die, qua ſepulcrum viſitabat, puer in eius gremio exiſtens, repente ferream ſepulcri cratem manibus apprehendens, ſuis ſtare pedibus, & ambulare cœpit, & ſtatim omnino ſanus euasit, ita vt per ſe deinceps ſine aliquo adminiculo ambulauerit; & inde melius ſemper ſe habens, intra nouem illos dies, quos promiſerat crura carne repleta ſint. & ſic perpetuo valēs, & ſanus deinde vixit.

Lam-

*VI. Lampades sola aqua repletæ ante imaginem Xauerij
ardent .*

In ecclesia Cottatæ oræ Trauancoridis in India Orientali, lampades positæ ante imaginem P. Xauerij, sola aqua benedicta repletæ, sæpe ardere visæ sunt; & per multas horas, ac si oleū haberent: & hoc in fidei christianæ confirmationem, & ad ostendendam falsitatem idolatriæ, & sanctitatem P. Xauerij, multis ethnicis, mahometanis, & christianis videntibus, & admirantibus: quorum aliquot præsertim ex infidelibus inuitati à christianis ad videndum miraculum, vt experimentum facerent de illius veritate: aquam subinde mutarunt, & noua elychnia in dictis lampadibus imposuerunt; quæ nihilominus arserūt, vt antea: & dum essent extinctæ, ignem interdum ex se ipsis concepere .

VII. Infans mortuus ad vitam reuocatur .

In Regno Trauancoridis Indiæ Orientalis infans vnus mensis magno ventris profluuiio, & feбри laborans emoritur, eius cadauer inhumatum seponitur tradendum postea sepulturæ; & per septem, & amplius horas manet contactum linea tela, quæ fuerat ad vestem funebrem conscissa ab ipsomet parente iuxta morem illius gentis. Interim cum parens filij mortem acerbè ferret: monetur ab amicis; vt filium Patri Francisco voueat;

G

quippe

quippe qui posset illi vitam reddere, cum tot, & tanta miracula patrasset. parens magna fiducia de Xauerio concepta; vouit ipsius Xauerij ecclesiæ, quæ apud Cottatæ oppidum est magnam eleemosynam, si vitam filio reddat: insuper se filio nomen Francisci impositurum. dumq. multis lacrymis precatur Xauerium, coram filij cadauere, vt suæ consulat orbitati: cernitur repente puer aperire oculos, mouere manus, pedesq., ac vuculas, & lamenta puerilia edere. accurrunt vndique circumstantes, videntesq. puerulum non modo viuum, sed omnino sanum, & valentem, acclamant, & mirantur tantum miraculum. Parens fuscitatum filium ducit ad ecclesiam Xauerij, & ibi illi imposito Francisci nomine, & collata eleemosyna, voto se exsoluit: atque omnes maximam exinde erga Xauerium concipiunt deuotionem.

VIII. Cæcus visum recepit ante imaginem Xauerij.

Quidam Malabaris nomine Chiambaratecure Thesaurarius Sanctæ Crucis oppidi Colechæ Regni Trauancoridis in India Orientali, dum festos ignes componit ad ecclesiæ prædictæ festiuitatem celebrandam, sulphureus puluis inopinato accensus, vultum illi pene totum combussit; & visum oculorum omnino ademit, ita vt nihil prorsus posset cernere. Cumq. aliquot iam annos cæcus perseuerasset: apparet illi in somnis P. Xauerius

uerius, eumq. monet; vt ad ecclesiam ipsius visitandam pergat: fore enim, vt hac ratione lumen oculorum recipiat. è somno expectatus ducem itineris statim accipit, atque in ecclesiam Cottatæ contendit; in qua Xauerus magna veneratione colitur: ibi per nouem dies commoratus, assidua deprecatione Xauerij opem, & patrocinium implorat; & dum ante Xauerij imaginem orat, decussa caligine oculorum, lumen repente recipit; & gratijs pro beneficio actis, domum suam reuertitur absque vlllo itineris duce: quæ à dicta ecclesia sex leucas distat: eamq. deuotionem animo erga Xauerium concepit; vt in illius honorem multa carmina, & laudes lingua Malabarica composuerit.

IX. Leprosus miraculose sanatur.

Franciscus Peremal natione Chiauallacaire in India Orientali homo adhuc ethnicus, cum toto corpore lepra esset affectus, & pustulis plenus; atque ab omni remedio humano desperatus, ac sæpius fidem christianam suscipere detrectasset: monitus in somnis à P. Xauerio, adiuit ecclesiam Cottatæ, cuius oppidi erat indigena: & ibi vngens se oleo lampadis, atque prostratus ante Xauerij imaginem dum illius opem implorat, repente mundatur à lepra, & integram sanitatem recuperat: quo viso miraculo, se conuertit ad fidem, & duos inde post menses baptizatur.

X. Dysenterica vngens se oleo lampadis Xauerij perfecte sanatur .

Francisca Rebella dysenteria, seu fluxu sanguinis tres menses continuos non sine ventris tumore laborarat . cuius morbi vis cum eam in vitæ discrimen adduceret ; nec amplius medicamenta ei prodesse viderentur : feria quinta maioris hebdomadæ venit ad Patris Francisci imaginem in Capella quadam ecclesiæ Societatis IESV Cqulani appensam ; vota inibi Deo nuncupat ; enixeque Xauerij auxilio pro recuperanda salute implorato ; cum acerbo ventris dolore , prout dysentericis euenire solet , se premi sentiret : vngit se oleo lampadis Patris Francisci magna fide , ac certa fiducia recuperandæ salutis : & repente omni dolore liberatur ; atque ex illa hora prorsus ab ea infirmitate conualefcit ; adeo vt nulla deinceps huiusmodi tumoris , & dysenterix senserit incommoda .

Pro tribus sequentibus miraculis .

Lucia de Villanzan Sinica annorum centum & viginti cognouit P. Franciscum Xauerium dum in India prædicabat ; & ab eo in fide christiana fuit instructa ; & ob id magnam erga Xauerium deuotionem concepit : eo deinde mortuo honeste semper , & laudabiliter vixit , frequentando sacramenta Confessionis & Eucharistiæ , & infer-

inferuendo pauperibus, alijsq. operibus pietatis vacando. Cumq. medaliā, in qua effigies erat P. Francisci, obtinuisset, in vrbe Coccini: duodecim ante annis ea tangebāt infirmos; vel aquā, cui eadem medalia iniecta fuerat, potandam praebebat; vel ea lauabat partes morbo affectas, nulla tamen vtens illicita caeremonia, aut superstitioso modo, sed magna humilitate, & reuerentia signans eos signo Crucis dicens. In nomine IESV, & Patris Francisci Xauerij tibi restituatur sanitas, qua indiges. quare praeuia humilitate, & deuotione, sinceraq. fide huius mulieris dignatus est Deus, opera mirabilia facere meritis, & intercessionē Xauerij, vt ex dicendis patebit.

XI. Laborans inueterato, & vlceroso cancro repente sanatur.

Gondifaluus Rodriguez de Valle Coccinensis accola maximum, & vlcerosum à multis annis habebat cancrum cordi proximum; ita vt nec manducare, nec quiescere, nec alijs actibus naturalibus vti vllō modo posset propter magnos dolores: sumptisq. frustra varijs medicamentis, motus fama miraculorum, quae fiebant virtute medaliæ P. Francisci, conuenit prædictam Luciam, eamq. genibus flexis precatur, vt medaliā cancro applicet: cui, vt illa morem gereret, facto prius Crucis signo cācro vlceroso medaliā im-

imposuit, verbis prolatis. In nomine IESV, & Patris Francisci Xauerij tibi reddatur sanitas: statim & eodem momento liberatus fuit, & penitus sanitati restitutus.

XII. Habens crura ulcerosa, & laborans dysenteria miraculose sanatur.

In Vrbe Coccini Emanuel Rodriguez annorū quinquaginta septem, habens crura vlceribus plena, varijs per aliquot annos in vanum tentatis medicamentis, ita in dies habebat peius: vt neruis contractis, crus vnum breuius altero euaserit; quo neque poterat incedere, neque terram tangere: & propterea gestatoria sede deferebatur: quibus malis ventris profluuium, seu dysenteria accessit; proptereaq. à medicis, prostrata omnino valetudine, derelictus est. cum nulla iam subesset spes recuperandæ sanitatis: tandem fiducia meritorum, & intercessionis Patris Xauerij, ductus ad prædictam Luciam, ab ea petijt deuotè, vt medaliā sibi applicaret: cui illa morem gessit, factō prius super cruribus signo Crucis cum verbis. In nomine IESV, & Patris Francisci, &c. & aquam deinde potandam dedit, in qua fuerat iniecta medalia: statimq. liberatus est à dictis vlceribus, & dysenteria: & intra triduum perfectam omnino recuperauit sanitatem, & sanus perseuerans nullo deinde impedimento ambulabat.

Mulier.

XIII. Mulier paralytica, & cæca sanitatem, & visum oculorum recuperat.

In eadem vrbe Coccini Maria Diaz vxor Ioannis de Caruaglio per septem annos paralytica ita laborauerat ex dimidia corporis parte; vt nec manum, nec pedem, nec quicquam ab eo latere mouere posset. item ita amiserat visum oculorum; vt à septem annis esset omnino cæca. In his infirmitatibus constituta; adita Lucia prædicta, penes quam medaliã esse sciebat, cum magna fide precata est; vt dictam medaliã suis oculis, & membris affectis applicaret; & aqua illius prædictas partes lauare dignaretur. quod cum eadem sæpius, & per septem continuos dies effecisset, imponens medaliã super oculos, & partes affectas, signans eas signo Crucis, inuocato Xauerij nomine, & easdem lauans: statim melius habere cœpit, & intra illud septiduum recuperauit visum oculorum, ac perfectam sanitatem recepit: & baculum quo antea ægra membra trahebat, reliquit in ecclesia Societatis IESV in memoriam accepti beneficii.

DE MIRACULOSIS Prædictionibus.

EX miraculosis prædictionibus huius Ser-
ui Dei aliquot principales etiam refe-
remus.

I

Cum infideles barbari Aceni è Somatra insu-
la Malacam venissent ad prædandum cum clas-
se, quæ constabat nauibus sexaginta, & quinque
millibus armatorum; inter quos erant Turcæ,
& Iannizeri non pauci: aliquot christianorum
naues in Portu Malacensi incenderunt; & in ca-
ptos Christianos eximiæ crudelitatis exempla in
odium christianæ fidei ediderunt. Quare hor-
tatu P. Francisci Xauerij milites Christiani non
amplius triginta supra ducentos in octo naues di-
stributi, barbaros insequuti sunt: licet re in vrbis
consilio agitata, ciuibus vniuersim temerarium
videretur, tam paucos aduersus tantam classem
huiusmodi expeditionem suscipere.

Præterea cum Lusitana classis è portu solue-
ret, Prætoria biremis spectante Ciuitate in ipso
portu, incertum quo casu, aperitur, & submer-
gitur, saluis tamen militibus. quo infortunio
excitatus populus infelicem portendi ratus euē-
tum, temerarium iudicabat, contra validā Ace-
norum classem tam paruo nauigiorum nume-
ro

ro

ro velle contendere.

Franciscus tamen Lusitanorum militum animos ad pium bellum accendens; vt Acenos Christi acerrimos hostes superbè abeuntes infectarentur, ijs præcipit : promittens certam Christi ope victoriam : eodemq. die pro vna biremi amissa duas venturas , & classi esse adiungendas, pronunciat. Et ecce ante solis occasum Franciscus à cælo admonitus, biremes duas Lusitanas, vnam Didaci Suarij nobilis institoris, alteram Ioannis eiusdem filij procul in mari conspicit, ex Molucis Patene venientes , instructas militibus, & bellico apparatu: altum tamen tenebant, cursum vltimus dirigentes, ne vectigal solitum, seu portorium Malacæ pendere cogèrentur. Conscendit illico lembum Xauerius ; ad Didacum Suarez contendit; eumq. ad bellum suscipiendum pro Christi nomine adhortatur. ille Xauerij rogatu; omni tributo exolutus à Præfecto vrbs Simone Mello , Malacam cum suis biremibus appellit; bellicque socium se offert reliquis Lusitanis. Hanc igitur tumultuariam militum manum CHRISTI COHORTEM Xauerius appellauit. Iuere milites Patris promissis, ac sanctitate freti. Cumq. iam vnus, & dimidiati mensis spatio nihil de illis sciretur; fama que ab infidelibus vulgata, nostri ab Acenis trucidati crederentur : ciuitas vniuersa mœrebat; & mulieres viros suos pro mortuis lamentabantur: multique ad artes illicitas,

H

tas,

tas, & mágicas recurrebant; vt aliquo modo scirent, quid tandem de illis actum esset.

Die igitur quadam Dominica sub finem concionis, ea ipsa die, & hora, qua nostri ad flumen Parles, quod Malaca distat trecentis milliaribus, promissam à Francisco victoriam, non sine miraculo obtinebant, occisis quatuor millibus barbarorum, & captis, vel demersis cunctis eorum nauibus: postquam Xauerus modicam astantium fidem reprehendit, Diuini spiritus instinctu ad Crucifixi effigiem conuersus, cum effusa corporis actione vaticinans; primum classium congressum verbis describere per ambages cœpit, ac si in ipsa pugna præsens adfuisset, auditoribus admirantibus. Postea ardentibus oculis, vultuq. pro pugnantibus orat: factoque deprecandi fine, corporis deficiens iactatione, caput, quasi fatigatus, summa suggesti sponda paulisper inclinauit. deinde inusitata oris hilaritate insurgens: Recitate, inquit, vnum Pater, & Ave, & agite Deo quantas maximas potestis gratias pro victoria, quam nostri hac ipsa hora de Acenis reportarunt; tribus tantum aut quatuor ex nostris in bello desideratis; & tali die vobis aderit ea de re nūcius. Diem etiam definiuit, quo nostri reuersuri erant spolijs onusti.

Vaticinationem multiplici successu exitus cōprobauit: nam biduo, triduoque post, eo die quo Pater prædixerat, nuncius aduenit; nostriq. spo-
lijs

lijs onusti dicta subinde die reuersi sunt: collatisque inuicem rebus, ac circumstantijs omnibus; constitit eadem ipsa hora, qua Pater Franciscus Malacę in tanta locorum distantia pronunciauerat, victoriam contigisse. illudq. pro maximo miraculo vniuersa ciuitas habuit: cū nonnisi diuina reuelatione, quę pronunciata sunt à Francisco, sciri potuissent.

I I.

Cum Pater Franciscus naui Iacobi Pereirę, cui à Sancta Cruce nomen erat, veheretur; obortaq. graui tempestate nautę, ac reliqui vectores timebant, ne procellę impetus nauem discerperet; ipse omnes hoc metu liberauit; & eam benedicens prædixit; nauem illam nō in mari tempestatis vi, sed in nauali dissoluendam. Deinde Pereirę nauarcho peritissimo denunciat naufragiū alterius nauis, quę vna cum ipsis portu soluerat; & breui se illius calamitatis cōspecturum indicia. Nec multo post sedata procella, viderunt super vndas tabulas, & cadauera fluentia; certissima dissipatę nauis indicia.

Cæterum nauis illa Pereirę annos prope triginta Patri Francisco superstes, quamuis vetusta, & cariosa, fluctibusq. labefactata, ex tot cursibus, ac tempestatibus incolumis semper euasit: quin vectores, institoresq. dictę prædictioni confisi in illam certatim suas merces imponebant; ac sine metu naufragij, iacturęq. vltro, citroq. commea-

H 2 bant.

bant. Quocunque appellēbat nāvis, tumultu, & plausu populi excipiebatur: & tota iam India illam vocabat nauem Sancti Patris. Demum Ducicuidam Dienſi diuendita, poſt multas nauigationes cum Coccinum appuliſſet, ibiq. in nauale ſubducta eſſet, vt quaſſata reficeretur, ibidem ſe ipſa diſſoluta eſt: & ſic Xauerij vaticinationem comprobauit.

III.

Cum Xauerius Malaca ad Amboinum inſulā traijeret: cum eo proſectus eſt Ioannes de Arauſio Mercator Luſitanus. ſub idem vero tempus claſſe Hiſpanorum vna, & altera Luſitanorum ad Amboinum appuliſis, cœpit ſæua lues complurimos vtriuſque claſſis abſumere. itaque Xauerius de more res neceſſarias, & medicamenta à diuitibus conquiſita, egentibus ægrotis ſuppeditabat; à diuite Arauſio eiufmodi eleemoſynas potiſſimum petens; qui tamen ſua tenacius conſeruans, iam ægrè præſtabat Xauerio frequentius petenti; metuens, ne ſibimet ipſi aliquando deeſſent. Vnde cuidam Franciſco Paleæ Xauerij nomine pro infirmo roganti vinum, ægre dedit: admonens, ſe id Franciſco tum quidem dare; ſed ea conditione; vt in poſterum aliud tale ab eo non poſtulare. Quod vbi Xauerio nunciatum eſt ab eodem Franciſco Palea: Xauerius repente, quid? exiſtimat inquit, Arauſius, poſſeſſionem eorum, quæ habet,

bet, fore diuturnam; & consumptur ū se esse suū vinum? errat certo; sciat, se in hac ipsa insula esse moriturum, & eius bona in vsum pauperum cessura. & postea eum monuit, vt libenter pro infirmis petita præstaret, animæq. suæ consuleret: quandoquidem illa esset vltima terra, in quam de naui excensurus erat.

Prædictioni respondit euentus. discedens enim Pater Frâciscus ex Amboino in Molucam, in eadem insula reliquit Arausium. Postmodum cum in Ternate insula, quæ vna est ex Molucis, post multos dies sacrum faceret in magna populi frequentia: post offertorium, conuertens se de more ad populum dixit: Orate fratres pro anima Ioannis de Arausio, qui modo in Amboino expirauit; & commendate illam Deo: heri sacrū pro illo feci, & hodie iterum facio. ad hæc mirati, qui aderant, post mutuos præ stupore intuitus, quæsiuere inter se; qua tandem ratione id scire Franciscus potuisset; cum ab eo loco distaret Amboinus passuum millibus amplius ducentis; & neminem per eos dies inde venisse constaret. admiratione deinde in expectationem versa, notatur res diesq. ab ijs, qui audierant: & tamdiū fuere de re dubij, donec interiectis duodecim diebus, naui ex Amboino, vectus Raphael Caruallius, Arausij mortem nunciauit: id quod etiam ex litteris à Ioanne Derio ad Xauerium missis, & à Caruallio delatis certo constitit; illum nimirum esse

mortuum in loco Tibiquifanis eiusdem insulæ: & temporibus præterea, ac rebus inter se comparatis; omnia cum Francisci prædictione congruere comperta sunt. Quare nemini dubium fuit, quin id Xauerus diuinitus cognouisset. adeoque illum, tanquam prophetiæ dono præditum, omnes suspicere cœperunt.

IV.

Meliapore quidā mercator erga Patrem Franciscum maxime pius illum salutauit in digressu, volens nauigare Malacam: instanterque petijt aliquid, conseruandæ illius memoriæ causa. Xauerus è collo detractam precariam coronam ei dedit commendans, vt eam magni æstimaret; & simul ei promisit, quod quandiu illam apud se haberet, non esset in mari periturus. quod ita prorsus euenit. Nam in ea nauigatione; cum iam esset propè Malacam, longissimè à Meliapore; nauis, qua vehebatur, vi tempestatis abrepta in mari perijt; & defiliens mercator cum nonnullis alijs vectoribus in tabulata, quæ ex lignis raptim composuerant, in alto mari alienato à sensibus animo deliquium, seu animi extasim passus est: in qua sibi videbatur proprijs oculis inspicere Patrem Xauerium, & cum illo colloqui in eodem loco, à quo profectus fuerat, & à Xauerio acceperat precariam coronam. demum quinto post die, ex quo desiliijt in ea tabulata, ab illa animi extasi, velut ab alto somno experrectus, repentè se vidit in
lit-

littore Negapatani prope Meliaporem saluum, & incolumem, ereptum à fluctibus, amissis, mariq. absumptis reliquis omnibus, qui cum eo in tabulata defilierant: quia neque amplius illi, neque ea comparuerunt.

V.

Cum Pater discederet ex Moluco, & trajiceret in insulam Mori, lætis omnibus, qui nauigio vehabantur: in medio cursu certo quodam die quasi indignans surrexit, & scindens vestem exclamauit: IESV, illi homines, qui occidunt illos homines! ceterum vectores nouitate permoti, ad Xauerium occurrunt; & quid rei esset, percunctantur: tùm ille in se rediens, re dissimulata, nihil esse respondit. Verum cum nauis ad insulæ portum appulit, comperiunt quosdam Lusitanos in littore à latronibus fuisse interfectos eo ipso tēpore, quo Pater prædicta verba protulerat in nauis.

VI.

Ioannes Durus Mercator adolescens ex Ceilano profectus in urbem sancti Thomæ, conuenit Patrem Franciscum Xauerium; vt cum illo confiteretur. confessione peracta à Francisco petit; vt semet vitæ socium accipiat; quod tandem post multas preces obtinuit; & opes suas in pauperes distribuere cœpit. postea tamen à communi hominum hoste sollicitatus, à Francisci obedientia se abduxit; & cum in quædam peccata incidisset, mercibus in nauiculâ occultissimè impositis, Xauerio

uerio infcio, vt credebat, parabat fugā. tum Pater occultæ fugæ consilium diuinitus cognoscens, subito per puerum eum iam iam è portu soluturum ad se vocari iubet: quo nuncio vehementer admiratus constitit; dubius quid ageret: sed rem dissimulans tandem decreuit ad Franciscū vocantem ire: quem vix limen domus attingentem, aspiciens Pater, Peccasti, inquit, peccasti. Quibus ille auditis submissō capite respondit; verum est, peccaui: cui adiunxit Franciscus, Accede igitur ad confessionem. quibus verbis Durus adeo fuit commotus; vt domum profectus, eo ipso die nauigium vendiderit; & facta confessione, atque in pauperes mercibus distributis, socium se, vt antea, Xauerio constanter adiunxerit.

Cum illo itaque traiecit in insulas Molucas, & iterum Malacam venit. inde in desertam insulā delatus, cum in æde quadam sacra moraretur de nocte: grauitè tentatus fuit a dæmone; & (incertū vigilans an somnians) insolita aliqua vidit. nec ita multo post, cum sua delicta de more cōfiteretur, visionem cælauit. at Xauerius re diuinitus cognita in confessione, ex eo quærit, quidnā rei in desertæ insulæ templo ei contigerit. nihil vero, inquit ille: cum Pater instaret iterum, & sapius: semper visionem cælauit. tandem Franciscus, vt vidit illum ex composito visa celare; ipsemet omnia enarrare cœpit. quod audiens Durus, obstupuit: & cognouit Deum in Francisco habitare; ac
de-

demum cum illo redijt in gratiam; cui postea Xa-
uerius denunciauit, fore vt Franciscanorum in-
stitutum, ac disciplinam amplecteretur, ibique
æternam salutem esset consequuturus. Prædi-
ctioni non defuit euentus. Durus enim Religio-
nem sancti Francisci ingressus est.

VII.

Cum Xauerius aliquando Machai apud Sinas
Petrum Vellium latrunculis ludentem in domo
aliena conueniret, ab eo petijt eleemosynam ad
opus faciendum: ei Vellius tradidit clauem arcæ
nummariæ, auferre iubens, quot vellet nummos.
Xauerius adiuit domum illius; & tercentis nū-
mis aureis ex arca depromptis, Vellio reddidit
clauem. qui rediens domum, & aperiens arcam
nummariam, nullam pecuniam ex ea cognouit
defuisse: & sciscitanti à Xauerio, quantum auri
abstulisset; Pater respondit, se deprompsisse ter-
centos aureos: cui Vellius se reperijisse dixit om-
nes, quot quot habebat in arca nummos, nullosq.
defuisse: addiditque, ei se arcæ clauem eo animo
tradidisse, vt ex æquo dimidiam triginta milliū
aureorum, qui aderant, partem sibi demeret: cui
Xauerius: Ego vero tibi Velli in Dei nomine pol-
liceor; nunquam Deum tibi defuturum dum vi-
xeris, & tibi semper suppeditaturum abundan-
ter ea, quæ tibi opus erunt; & omnes tibi libe-
rali animo, & voluntate largituros: quinimo di-
uinitus supremum vitæ diem agnosces. Nec Vel-
lium

lium Franciscus sefellit : quia licet ei acciderint multa, quibus esset casurus in paupertatē, nisi omnes eum liberaliter iuuisent: nihil tamen illi aliquando pro se, & pro sua familia defuit.

Multos igitur post annos diuinitus de instanti morte Vellius præmonitus rem suam familiarem magna ex parte in pauperes prius diuisit: missas celebrari pro anima sua iussit: propinquis, & amicis vltimum vale dicens, Xauerij prædictionem, eiusq. euentum lætus ijs exposuit; qui eum delirare credebant. At vero cum interfuisset missæ, solemnī ritu defunctorum celebratæ; ipse se in feretro composuit tapete coopertus, mortē senex expectās. Finita missa, & dicto à Sacerdote responsorio, Requiescat in pace: accurrerunt famuli eius, vt auferrent tapetem, credentes viuum esse: sed ille iam animam creatori suo reddiderat: quæ res comprobauit Xauerij vaticinationem.

HÆC sunt, Pater Beatissime, quæ ex legitimis actis huius causæ dicenda fuerunt de vita, & moribus Serui Dei Francisci Xauerij Societatis IESV; ac de miraculis illius intercessionē, & meritis factis. Quibus latius in pluribus Congregationibus diligenter perpenſis, atque discussis, Cardinales Congregationis Sacrorum Rituum in eam sententiam vnanimē venerunt: Posse Sanctitatem Vestram (si ei placuerit) ad vltiora procedere, & Canonizatione-